

Headline **Keledek ladang kontrak beri pulangan lumayan**
 Date **10. Apr 2008** Language **MALAY**
 Media Title **Berita Harian** Page No **9**
 Section **Nasional** Article Size **291** cm2
 Circulation **217920** Frequency **Daily**
 Readership **2083000** Color **Full Color**



Keledek ladang kontrak beri pulangan lumayan

Oleh **Mariam Mas Yaacob**

SEKTOR pertanian masa kini semakin berkembang selepas pelbagai program dilaksanakan. Pengeluaran hasil pertanian melalui sistem ladang kontrak sudah lama dipraktikkan bagi membolehkan pengusaha menumpukan sepenuhnya terhadap peningkatan pengeluaran hasil.

Ladang kontrak adalah pakatan strategik antara pengeluar dan pemasar bagi menangani lambakan hasil disebabkan masalah pasaran yang berhubungkait dengan kualiti dan mutu hasil keluaran.

Pertubuhan Peladang Kawasan (PPK) Johor Bahru Timur mempraktikkan ladang kontrak melalui jalinan kerjasama dengan Lembaga Pemasaran Pertanian Persekutuan (Fama) bagi mengusahakan tanaman keledek gendut dan merah di Zon Pengeluaran Makanan Sedili, Kota Tinggi, Johor.

Konsep ladang kontrak sudah banyak diusahakan di Johor dengan pelbagai jenis tanaman makanan. Antara jenis tanaman makanan dan tempat yang sudah dan akan diusahakan secara ladang kontrak ialah tanaman jambu batu di PPK Muar Tengah, tanaman nanas di PPK Pontian Tengah, tanaman nangka madu mastura di Sedili, tanaman sayuran kacang panjang dan sayuran campuran di PPK Pontian Timur.

Projek tanaman keledek ini pada awalnya dilaksanakan oleh usahawan tetapi kurang berjaya kerana aspek pengeluaran tidak diberi penekanan. Melalui konsep ladang kontrak antara PPK dan Fama, penekanan terhadap pengeluaran hasil bermula peringkat penyediaan tapak hingga ke peringkat pemasaran yang dipantau secara berjadual.

Pemantauan pelaksanaan projek akan dibuat oleh Jabatan Agensi MOA Inc manakala pihak Fama pula akan menentukan kualiti dan kuantiti yang diperlukan mengikut gred.

Mengikut konsep berkenaan, PPK atau usahawan yang terbabit perlu mengikut spesifikasi ditetapkan oleh Fama berhubung varieti keledek, jadual penanaman dan jangkamasa pengeluaran serta kuantiti hasil.

Penilaian sebenar kos/hektar akan dibuat oleh pihak Jawatankuasa MOA Inc dan jadual operasi akan dimaklumkan setelah menerima laporan daripada pihak terbabit. Dalam hal ini PPK akan memberi tumpuan terhadap aspek pengeluaran manakala Fama tertumpu kepada segi pemasaran.

Setiap kos yang terbabit berkaitan pengeluaran akan disahkan oleh Jawatankuasa Ladang Kontrak Daerah. Pihak Fama tidak terikat dengan penentuan harga sebaliknya ia akan ditetapkan mengikut keadaan semasa.

Fama memberi jaminan bahawa harga yang ditawarkan kepada PPK dan usahawan melebihi harga kos pengeluaran.

Penentuan jadual pengeluaran adalah berasaskan kepada keupayaan pengeluar dan kebiasaannya tiga hingga lima tan metrik/0.4 hektar mampu dikeluarkan setiap minggu. Di samping itu, jadual pengeluaran hendaklah disesuaikan untuk tempoh setahun bermula Julai hingga September setiap tahun.

Pada masa itu, jumlah pengeluaran yang diperlukan mencecah 10 tan seminggu. Jadual pengeluaran hasil juga perlu dibuat pada musim panas kerana harga pada musim itu agak tinggi.

Penentuan harga di ladang ditetapkan mengikut harga di Pasar Borong Kuala Lumpur dan Johor Bahru. Harga akan ditentukan 50 peratus pada peringkat ladang dan selebihnya ditentukan mengikut permintaan pasaran.

Kaedah penentuan harga setiap kilogram keledek daripada peringkat ladang hingga kepada pengguna, contohnya ialah harga di ladang 50 sen, harga borong 85 sen dan harga pengguna ialah RM1.50

Penentuan harga turut dipengaruhi oleh gred keledek yang dijual. Bagi mendapatkan harga tinggi di pasaran, keledek perlu digred terlebih dulu. Secara keseluruhan keledek hanya mempunyai dua gred iaitu gred A yang bersaiz besar dan berasaskan varieti dengan purata berat 500 gm/biji dan gred B yang bersaiz sederhana dengan anggaran berat tiga biji setiap kilogram.

Keledek yang dihasilkan pula perlu dibungkus mengikut standard pasaran iaitu 10 kg/unit dengan tempoh dua minggu jaminan kualiti selepas dikutip. Bagi menambah pendapatan untuk menampung kos operasi tanaman keledek boleh diselang-selikan dengan tanaman labu Taiwan kerana ia mampu mengeluarkan hasil selepas enam bulan ditanam selain mudah dipasarkan.

Penulis ialah Timbalan Ketua Pengarah Pembangunan, Lembaga Pertubuhan Peladang (LPP) yang juga Alumni UPM Kelas 1972. (Ruangan ini dikelola oleh Persatuan Alumni UPM dengan kerjasama *Berita Harian*)

FAKTA NOMBOR

Tanaman keledek secara ladang kontrak

5 tan
Hasil setiap 0.4 hektar

10 tan
Hasil keluaran setiap minggu

RM0.85 sen
Harga borong

PPK dan usahawan yang terbabit dalam projek tanaman keledek ini perlu memberi fokus kepada aspek pengeluaran dengan berpandukan Amalan Pertanian Baik (GAP). Usahawan juga akan diberi pendaharan melalui lawatan ke projek yang berjaya, manakala PPK akan menyelaras dalam aspek pengeluaran termasuk perkhidmatan kepada usahawan bagi memastikan projek berjaya.

Headline **Keledek ladang kontrak beri pulangan lumayan**
Date **10. Apr 2008**
Media Title **Berita Harian**



SUBUR: Penanaman keledek melalui konsep ladang kontrak sentiasa dipantau secara berjadual Jabatan Agensi MOA Inc dan Fama.



BERMUTU TINGGI: Keledek yang diusahakan secara ladang kontrak oleh PPK Johor Bahru Timur.